

銅梁山人詩集

序

王子春見鎮之先生於上谷出眎均堂詩集卷一
又從丁學博滄泉所借鈔長水集一卷爲先生寓
構李時作錢文端公於先生有快壻清才之目尤
心賞其詩每一篇出輒長吟數四幾於放先生出
一頭地今集中所抄皆香樹老人口沫手胝碎壺
擊節者也是時先生年甫冠而根源盛大已欲突
過前人至均堂集則守保定以後之作出入風騷
醞釀經濟圓渾超脫聲實相中置之六代三唐作
者之林可以獨當一面如筠鈍不能詩恨不早從

先生遊提鉛握槧垂十年訖無所成今始得問津大方得先生詩奉以爲鴻寶之秘遂合鈔二集爲編凡四卷又先生自言通籍後自爲郎迄作郡有藤花集玉脂山房集若干卷皆不欲自存而謬爲朋輩傳寫又嘗撰易林注漢書考證諸書及星象勾股闡述之言不下數十卷但脫藁卽皆焚去散軼者不獨詩也嗚呼此可以見先生之志矣以先生之淹通奧衍加以什伯古人之才識顧於馳騁翰墨則曰聊適已事而已詎可覆帚可享無毫髮加損於心今世膚學之士纏學操觚便思以梨棗

自壽人知之則以爲喜不知則以爲憂覩然號於
眾曰是區區者吾將藉以傳也聞先生之言當亦
立咫焉汗浹衿也乾隆壬子三月朔大庾後學李
如筠序

序

詩者志之所之詞者意之所達上以表君父之恩際下以紀生平之厯游然而一代蘭交同時石友無不並垂題詠兼載譜年是以吉甫作頌而申樊並傳子建賦詩而徐劉咸在杜陵之感嘉郡有蜀川人日之詩山谷之和東坡爲天上玉堂之作蘭亭之遊不再感慨係之醉翁之客僅存悲歡何限貴不忘賤拓金戟而懷人愛益思傳附青雲而朗詠大中丞鎮之先生清德象賢詞宗快婿羊祜尋鎔之歲不侍高牙陸雲對廝之年薄游

長水時則令外舅錢文端公林下耽蟬家居扶鹿
書傳王粲卓犖驚人詩勛昌黎縱橫不世夜繙諸
史籌燈范母之前曉和千篇瑰佩秦甥之館宗伯
沈歸愚先生八旬耆會二老同游攜五六人酌方
員水命和竹爐之什立揮石跳之旁宗伯標題定
爲第一訂交任昉湖泛鴛鴦結契徐陵樓登煙雨
此長水集之所爲作也旣而偕登蕊榜獨步藤廳
選郎筦澄敘之方銓政仰冰衡之寄公則顏竣嚴
毅裴楷清通餽遺不受餅飧公謙只談風月屢排
廷衆取重相臣時則程魚門錢南園任子田沈南

雷鄭秋浦陳伯思諸先生或偏僻居官或鏗鏗談
道圖中九客都爲日下畸人座上千言時有雲樓
佳句於是又有藤花集公玉脂一硯傳自先公義同
韋相之經廉比隱之之石醉齡分授處處相隨素
質彌堅朝朝染翰於是又有玉脂集公出守襄國旋
調會城錯節相貽棼絲待理武郡方資廉范漁陽
早倚張堪幾無聯句之間但有行春之作然而謝
庭賦雪不乏鴻篇庾閣吟宵尤多稚興王陽明橫
戈捕盜卽爲講學之時黃次公露冕觀風未廢談
經之事哭親朋於千里天涯之傾蓋難忘感陳迹

於五言前日之雨花曾憇於是有助堂集公廉操
銘於

宸宸治績達乎

主知長孺甫輒而復庸子文旣已而還仕分符上
谷感

恩親誨疲氓建節天雄化俗仍操勑旅露堂肆射
白金鑾亦解談兵雪磧催軍周公瑾偏能橫槊豈
獨王祥佩刀興懷同氣張華說劍遠憶故人而已
哉於是有助堂集公廉操

眷重

兩朝恩邀

特擢星於北下袞繡東來懸皎鏡而增寒照明湖
而倍澈趙康公之讞獄何暇憩陰于定國之持平
幾勞達旦官廚易冷每聞寒典冬衣上客同飢祇
合晨餐秋爽瑯琊之刀五尺久換耕犁東蒙之翳
幾重不煩柯斧幸承風者二載拜臨別之一言於
是有華不集嗟乎鳳翔雲遠戀德常難鶴警

天聞拜

恩何速正揚清於東國爰布澤於南江簇蠶則民
俗先謠歎乃則棹歌能譜賀花成曲千枝豈植庭

中飲水論心一掬謾勞僧送皖江何幸溫公之節
早臨靈澤相望范相之篇爭紀於是又有具區集公
甫駐此邦適逢偏旱告災請賑屢荷恩言察吏巡
畧宣傳民頌電掃而清伏莽風馳而息桂苻除宵
哦雨雪之途千里唱淮淝之捷此則雖未成編已
聞傳誦者也若夫詞也者玉田旣往春水空流淮
海不存微雲誰領訪晏殊之珠玉尋謝逸之溪堂
酒邊常有新詞花間豈無傳集然而白石乃詞中
之杜甫東坡爲樂府之鮑昭公則氣挾大江超同
疎影西泠一闋竭來五百松風南浦數音何處廿

陂飛雨迎秋送暑俱堪填付小紅檣燕江蛩間亦
寄聲梅子蓋公詞之肖姜夔猶公詩之宗韓愈酒
酣高唱可遏行雲旅夜清吟能驚山鬼有其似之
無不及矣於是玉脂詞蓮果詞華不詞焉凡茲
十有一編都爲二十六卷比燕公之全集已益一
緘待文正之續編卽盈卅帙惟公博物優於蒼雅
識字過於爰將句成每壓賓筵稿佚還存友橐而
復風流獎後慷慨論交雀廈知歸龍門願託梧昔
從兄武昌竊窺風範兄謂梧曰銅梁昆季天下之
偉人也及從政岱陰服官麾下眞覩伯夷之行早

登茂叔之堂豈圖疾引方來飢驅又去預聞韶於
大國累月無違陪講德於編氓長言未足
嘉慶八年歲在昭陽大淵獻新安後學東蒙屬吏
洪梧拜手謹序

序

文能載道詩書偕功德俱傳歌以永言竹素與鼎
鐘同壽吹九霄之聲咳鳳凰鳴而百鳥知歸抉萬
丈之光芒泰華立而羣峯爭仰調聲叶律聽鈞天
廣樂之音猛簾洪鐘奏清廟明堂之響然而處士
乏江山之助大官多簿領之勞苟非具鉤河摘洛
之才散錦橫珠之質奚能凌轢崔蔡控駕齊梁七
字成而金石流聲雙旌指而山河壯采用是軒夔原
帝載喜起皇風政如蘇白亦號詩人賢若皋夔原
稱才子名斯盛矣遇亦隆焉

大中丞鎮之先生華望烏衣清風虎節開府則人
稱濟美趨庭則瑞掇駢枝英華咀兩漢之精腴潤
擷三唐之秀東牀奪席舊傳夜半之衣西蜀多才
新浣江邊之錦爲詞宗之快壻冠多士以芳名薄
遊而長水成編觸緒而短歌寄興經貽韋母剔殘
几案篝燈宅館秦甥吟遍樓臺煙雨旣而班聯玉
筭宿映銓曹四友以柏馬成奇九客與藤花並燦
香煙朝罷唾地立就三篇珠玉吟成刻燭尙留一
寸而且撫墨光於手澤石硯摩挲摛藻采於心源
玉脂溫潤洛下一朝紙貴平原五色絲多或似迴

風飛絮吹入中書省來或如密字真珠攜上孝廉
船去此又蚌胎之隱現需時寶器之升沈有數耶
迨夫五馬一麾仍復千言疊唱楊柳行春之地景
不空描旌旗按部之時語皆成韻凝香燕寢韋蘇
州畫戟森嚴妙詠汀洲柳吳興白蘋風雅蹙奔塵
於恆水雪帳親勞揚輕旆於潞河玉弓纔挂坳堂
一集此其選也已乃恩既承乎湔祓任尤重於封
圻談兵而豪溢眉間振旅而歡騰闔左居庸集韜
鈴馬上猶傳紫萸黃菊之篇恆山集碧玉壺中不
乏水月兩花之句於是揚鑣上谷移節東蒙玉局

則跡表湖山漁洋則鄉稱桑梓旋來旬於南國爰
問俗於春郊山川以吳會爲名區財賦以江鄉爲
重地公迺擁芙蓉而豔若對琴鶴以適然譜款乃
之數聲領中泠之一勺猶復煙墨受召金絲引和
歷萬灌而劍乃稱神經九轉而丹逾見寶論文章
於庾信老去更成推格律於杜陵晚年益細則華
不具區又煌煌其成集也維公皖江再泣於今三
年百室呼庚喚咻而登衽席千山聚米談笑而掃
櫈槍鄴架香清依然運甓庾樓月白不廢雅歌或
皆斯編所未及傳抑亦猶他樂之未敢請乎夫廣

歌雲日咸仰昌期唱和柏梁允稱盛事應入宣尼
之采直登表聖之門莫不戶習瑞摩人知楷範公
以綺年而稱名士壯歲而佐清時俗茂風醡研精
覃思言敷丹陛化作祥風墨染黃麻都成甘雨眞
太平之潤色足鼓吹於休明也已至於詩餘三集
附以偕行譜樂府之新聲續天孫之餘錦香絃欲
語綺思將飛重翻白雪之歌并寫烏絲之帖則又
柳耆卿姜白石諸賢所當避席者也鎔借地階前
服官麾下奕奕軍門之榮幸許登龍翩翩荆樹之
花曾容附驥佛以因緣爲重儒稱遭際之榮捧郵

箋之飛遞暗剔乾蠻排玉軸以徐繙洞窺全豹香傳梅閣書萬本而手欲生胝詩咏蘭亭附巨製而名期不朽嘉慶十年正月旣望皖江屬吏宋鎔謹序

國史列傳

王汝璧四川銅梁人乾隆三十一年進士分吏部學習三十六年正月補主事十一月陞員外郎三十八年截取

記名以繁缺知府用四十年四月陞禮部郎中經吏部奏留八月補吏部郎中四十四年丁憂回籍四十七年服闋四十八年七月仍補吏部郎中八月授直隸順德府知府四十九年調保定府知府五十五年因承審直隸建昌縣盜犯馬十等行劫錢鋪一案經巡視西城

御史拏獲隨同行割之王二入奏

諭將獲犯馬十解交軍機大臣嚴審並以王汝璧
於割盜重情接到委牌案懸多時並不親訊
其不是更大著歸案質訊旋經審明奉

旨革職發往軍臺効力尋蒙

恩准贖罪降補同知五十六年四月署宣化府同
知五十八年三月授正定府知府九月陞大
名道嘉慶四年二月陞山東按察使十月會
同布政使全保參奏德平縣知縣葉芳浮收
漕糧釀成重案請將葉芳革職並自請處分

奉

旨交部議處

諭曰此案重大自應一面親往查拏一面迅速馳奏乃僅照尋常事件用三百里驛遞遞到在直省之後尤屬不知輕重緩急全保王汝璧俱係朕甫經擢用之人於地方要件何得疎玩若此著傳旨嚴行申飭嗣經部議降二級調用奉

旨准抵銷五年閏四月遷江蘇布政使六年三月護理江蘇巡撫十二月授安徽巡撫七年五

月奏潁州府地處省北邊境附府之阜陽縣幅員遼闊與豫省之固始息縣新蔡項城沈邱五縣毗連犬牙交錯兩省奸匪逃竄最易潛匿查該縣之驛口橋集水陸交通路徑錯雜應添設督捕同知一員專司緝捕并應酌設營汛移撥弁兵以資巡緝下部議行八月湖廣總督吳熊光等奏楚省應需兵米請於安徽湊足十萬石解楚接濟

上以本年安徽省有缺雨之處糧食未必充裕諭汝璧酌量情形或稍減數萬石亦無不可總須

於市價民食不致妨礙方爲妥善尋奏楚省
軍需重大自當如數派撥惟是水次各屬本
年缺雨之處較多其存倉穀石似應酌量留
貯以備碾糴現在各屬糧價稍增亦不便再
行採買致妨民食查嘉慶二年安徽省曾經
碾米六萬石運解湖北今請照案碾動六萬
石分起趕運所有減存米四萬石卽留爲各
該縣借糴之用

上嘉之如所請行十月奏太湖縣續報成災地畝
懇請一體緩征並將勘報遲延之府縣請

旨議處

諭曰向來各督撫查辦災賑事宜於業經奏報後遇有續行查出災區往往迴護屬員稟報遲延之咎遂將小民病苦置之不問今王汝璧將勘報遲延之府縣據實叅奏所辦甚是太湖縣知縣高薰業及安慶府知府樊晉均著交部議處十二月因宿州匪徒戕官滋事帶兵馳辦尋奏勦辦淨盡將本標後起兵三百名先行撤回歸伍

上是之八年閏二月

上以汝璧年力就衰改授內閣學士十二月授禮
部右侍郎旋改授安徽巡撫九年六月具題
買補倉穀本內字句疎率交部議處八月奏
請清查安省倉庫分別追補定限四年全行
完補得

旨允行旋經藩司邵洪奏請展限六年復

諭汝璧妥爲籌酌九月覆奏彌補章程以各屬情
形每年覈其盈餘節省彌補前奏定限四年
實屬有贏無絀無須再爲寬限

上是之十二月授兵部左侍郎十年調補刑部右

侍郎十一月因病請開缺

恩准回籍調理十一年七月卒

銅梁山人詩集目錄

渝江王汝壁
鑄

長水集

卷一

卷二

卷三

藤花集

卷四

卷五

居來集

卷六

均堂集

卷七

卷八

居庸集

卷九

卷十

卷十一

恆山集

卷十二

卷十三

卷十四

卷十五

卷十六

卷十七

卷十八

卷十九

卷二十

華不注集 卷二十一 卷二十二

具區集 卷二十三

皖山集 卷二十四 卷二十五

銅梁山人詩集卷第一

渝江王汝璧錄之

長水集

汝璧生甫晬而孤依母存活衣食給於鍼黹
織紝以供鉛槧每鼴出就外傅夜歸坐紡車
側背誦經書青檠熒然寒影相响茹荼集蓼
十有八年庚辰春出贅婦家奉母僑居長水
外舅錢文端公割宅以居昕夕就文端公討
論古今學識日游有進先是所爲詩多矜孤
愁恨之音至是悉屏去一以中正和平爲則

每有歌詠文端公輒歎賞曰老夫弱冠時未能過此也壬午舉京兆試癸未下第南還汗漫江湖間作詩不下數百首隨手散佚者之四五又自以卑弱不足錄者汰之過半存一百四十一首釐爲三卷日長水集間字長水之年志不忘也

善哉行

去日如何遐哉逝波來日遲遲我謠且歌出日入月動煦息咄怡怡迺躬厥惠旣多酣酒炙肥棄德則那洪厓浮邱孰知其他元化貞貞庶彙雅雅率

由天庭貧賤亦可決一勺水流爲江河高步罔知
顧影則蹉井渫之食蠲彼泥苴華鄂之萼篤我根
茅

西門行

出西門步念之睂浮景颺輪馳單衣負薪負薪行
安之擣葵爲齋鬻石爲糜當憂而樂長笑當悲上
堂拜我母還顧妻與兒寒烏啁啾載集載飛廉吏
子孫貧賤困窮命所施廉吏子孫貧賤困窮命所
施云何敢言兢兢奉前徽同心好修樂我壎篋

東門行

出東門平慎歸一僧粟月以支一穟絲歲之餘來
日良難子將奈何顧語親交樂哉我饑鐵鎗欲折
載編以韋穆穆邃古及于今茲仰視皇穹蓋天俯
擊土鼓康衢煌煌鉤鈴星炳焜璿與璣下士忻忻
當食貧此時下士忻忻當食貧此時百昌蕃滋其
榮其腓葆茲寸荄永賴春祺

擬迢迢牽牛星

迢迢牽牛星上將居中央左右列兩旗玉帳何堂
堂櫬槍亦已滅枉矢不敢張跂彼雲漢女終日勞
七襄織錦爲戰袍織素爲旛常書銘耀日月被服

生威光願郎策大勳麟閣圖輝煌豈不勝七夕靡
靡鵲鴛梁

擬庭中有奇樹

庭中有奇樹枝葉何葳蕤上柯棲鳳鸞下根盤蛟
螭高高凌霄花如附蘿與絲不知幾百歲篤此冰
霜姿匠石不得顧盤攬而支離白日藉嘉蔭夜月
宿留之軒然雲霞蟠永與松喬期我無相思人折
之將遺誰

擬明月何皎皎

明月何皎皎孤光入我幃懷古不能寐起視攬清

輝中庭寂無聲露下霑我衣烏鵲匝樹飛驚詫棲
無枝飛蟲自翾翾幽景相因依人生貴知足淡定
氣乃奇本無金石堅強作山嶽思千秋百歲後素
月悲金罍

擬涉江采芙蓉

涉江采芙蓉集爲裳與衣綴以明月珠織以鮫人
絲世人苦不識疇敢服此奇借問被服誰湘君與
冰夷哀哉楚靈均從之何太悲蘭澤生眾芳何處
遺所思丈夫貴一心奚用遠致爲

夏夜讀書呈家兄士會

凍雨忽已過牕戶含餘烝倦雲積天角浮波生玉
繩蜘蛛絲下敗網蠅迹緣癡蠅冷然夕景入漸可羅
衣勝暝合流響聚幔卷空烟凝分光理舊簡幽尋
騷前徵邁征抱篤摯虛契識依憑眇慮欲遺想在
感猶奮興石銚咽殘漏砌蟲遞微聲怯膽信神鑒
佳氣生眉棱夙夜獨兄弟古今無愛憎卽此得眞
意未易喻良朋

寓齋口號

爛烝紅飯煮青蒲笑典春衣看賣珠牕草芊蒙高
似屋樵青煙眼泣風鑪

碌碌要爲門戶計依依如覺別離難攜來夢草池塘句促就簷花雨夜看

雞冠花歌

脛脛膊膊風葉號磊磊落落花冠高花神絳幘雲
錦繅頭上殊有威鳳毛祝雞老翁舊相識尸鄉干
樹皆手植雲機剪落秋星搖朱公魂返籬根黑忽
驚檐際生細縕青鳥銜來赤羽幡涼秋那得火繳
起長空燒破齊煙痕桃都山在何許跔鳥翻翻秋
欲暮獨立斜陽寂無語可能飛上扶桑巔朝朝羽
衛羲和馭不然夜深玉鏡開塵面凌風舞向秋空

去

夜坐

夜氣浩如水霜月冷欲滴寒飈何處來吹之過東
壁流響沉虛堂暗蛩織古甓殷憂環無端有酒不
能喫

壬午正月四日訪宮守陂寓齋出舊臘雪中
用東坡聚星堂韻禁體詩見示次韻奉和

膠泥菜甲未吐葉臘雪不已復春雪迎年街鼓聲
欲沉望歲村農笑不絕已聞百里澤腹堅更判幾
量屐齒折凍鱗赴壑走且僵飛爪印泥明復滅叢

君硬語排嚴冬八手一片冷光掣看騎生馬搏長蛇攬岸厯山但眼纈急觴快倒清若空深談劇好罪如屑偶然話到凌雲遊鏡裡峩眉想飄瞥看雲句好山何慙君言有詩數章寄令弟虛谷太守鏘嘉州大佛巖上歸家夢冷吾空說未能袖手還強吟料峭寒聲撞簷鐵

曩同士會兄偕錢士季過守陂飲戲語云不速之客三人來守陂續成十六韻索和時予兩人將應京兆試守陂與士季亦倣裝往謁選人次韻奉酌非代錄別

不速之客三人來昆侖方壺何壯哉蘧蘧未醒御

風去連雕結股誰仙才別後索居十日雨日日愁
望頑雲開紛綸意緒重悵觸兀坐不語魚鉤顚黑
甜一枕日亭午家山萬點青毡裯長鬚火急報新
詠打門更迭驚齁雷拄頰揩眼百回讀終日不嗄
號如孩頗念小子太狂簡成章安得夫子裁三年
淹留越女笑到處茗芋吳兒咍滑稽壺腹亦國器
底須屑屑爭瓶罍晨雞不惡醉起舞玉山未倒松
不摧兩君辛勤求祿養俯給妻子仰耆台而我齷
齷寄芻秣鹽車那得重銜駘出門漫向輭紅笑便
當高舉翀煙埃尙愛南湖澣釀漾眼前且築糟邱

臺浮雲前路望莫極新黃早放天街槐

嚴瀨舍舟入胥口雨中山行卽目成歌

蒲帆幾日飽風雨行雲送我入山塢厓奔谷蘁陰
磴送天空縹渺修眉嫵仄磇劍淬騰猿公空巖花
落下鹿女攬人奇樹臂突伸壓虛危广頭深俯紺
乳溶溶古竈封白石鄰鄰亂泉煮人間何處非遽
盧山中信美卽吾土峯腰忽得小平處一畝之宮
數弓圃便當抱甕謝桔槔誰使歸雲爭子所遙指
前山雨腳收有人叱犧相爾汝明知村路接朱陳
疑有仙巢住茅許眼前好景望不窮欲攬全勝意

多阻更緣花氣過前溪叩門求飲誰乞予

題墨梅

蚪雲鬱輪困冷月照幽素沙水光泠泠疏影印回
互相逢綠衣人微笑索題句

與守坡別一年得怡雲方伯手書并示近詩
知由楚入都已就道矣又兩月不至卽和送
行原韻寄懷

經年判一別安訊巧相違夢逐謝公屐書傳萊子
衣征鴻纔北嚮蟬燕未南飛來往紛何事區區笑
所依

頃見南來說征帆信尙違衡雲遮浦雁梅雨點春
衣短鬢誰簪盍長風獨馭飛勾留更何事那得道
因依

塵土歸途暗鶯花舊約違春心憐寸草淚眼記殘
衣六月真成息三年竟不飛何因久留滯待得暫
相依

放手親知散低頭壯志違當歌慚白雪適館敝綺
衣天未晨星遠江干舊雨飛仕貧良不惡在德信
神依

讀唐宋諸家詩率成長歌

言之不從謂不乂全义郊島皆詩祇元精刻鏤混
沌死閒明夜吼昆侖搖韓公騎箕下南斗上司喉
舌扶天杓麾斥百怪各儀舞騰身汗漫歌咸韶廟
堂萬禊獨展拓鼻祖甫白還從祧元和長慶體屢
變自鄙而下音聊聊尙愛昌谷麒麟兒野春古艷
生空寥彩虹囊括駆驅背唾花碎繡皆雲綃後來
六一頗振拔能以雅健當韓豪半山老狐大姦黠
詰屈自是資其驕西江宗派復橫溢瓣香迺爲涪
翁燒大峩仙伯游逍遙頗黎秀綠浮眉梢岷江東
下不肯住蕩氣破垢驅夔魈退之驚笑子美泣汗

流觀鞬鞬張冕細雨騎驢劍南老後勁猶欲追前
茅吁嗟此道誠足尙筆不能達意自標圖書典誥
彖象爻琴瑟跳磬笙鏞箭辭嚴義秘音礲鼙濫觴
雅頌流風騷太空萬古轉天籟何有眾竅之調可
東山之胸西山眺百年消息汐與潮玉丹金瀝不足
貴况迺鹿鹿連雁尻零星碑版蝕風雨新聲靡
曼爭娥媚分明呼白誰得梟歸去來兮歌且謠

夜坐見蟹作歌

畢月之精畢逋尾不能爲神下爲鬼陰緣壁角拾
蟲豸先張之弧反射矢前驅怒臂立掎掎倒控矛

父搖股髀賈勇欲學常山蛇甘人觸之血流指范
則冠而蟹有匡隱頤縮腹形獨傀母背償裂子始
蕃蝮蛇蓁蓁同一軌周公怒命赤友氏迺復逋逃

過淮水至令子美終夜愁不信退之照壁喜乾坤
生化德泰大么膚蠕動力相抵吁汝無知小蟲子
何獨跳踉自速死守宮脈脈盤膾襦笑看膏汝賣

入市

廟市賣竭藥
搗蝎膏爲之

聽琵琶

別恨羈愁兩逼真勞勞誰是可憐人樹頭啄木渢
嗔客花底流鶯自怨春紅袖歌雲催白日青衫淚

雨暗緇塵輶雷一撥空堂寂好借迴帆問去津
夜坐有懷寄家人用昌黎韻

眊瞓落記室炎歠烝紙牕入幕燭豔豔打衙鼓逢
逢消息斷鄉邑聲稱謝家邦彳亍走風雨沙埃日
春撞心源塞眢井腕力聚豐扛懷人淚垂四抱影
愁空雙飽死笑方朔柔存師常縱悠悠閱書史茫茫
汎泝濤江饑鼯伺鉛槧獵蠂喧旌幢細泉咽火鼎
流魄斜星杠腸車轉曲棧腹雷殷空缸倦書印風
簾耿夢然花釭嬌兒玉頰瘦老僕霜眉龐曰歸計
未得旣見心則降塵海積块北肉山羅峰肛眩目

失駛景厯耳爭紛颺逝將逐風列高舉從老龐豐
年報土鼓朋酒擣羊腔叱牛臥荒阪狎鷗浴淺瀧
鋤雲趁簾深采山入崆峒漁煙下葦齋風棹纜柳
椿一笑百感釋萬古東流淙

憶南湖

止水閒雲寄此身袖中擣得五湖春文鴛繡鳴渾
相識還仗南湖作主人

一笑相留看海月五年歸計負江神而今底又羈
塵埃湖畔鴛鴦也怪人

愛他百頃芰荷風晴自夷猶雨自濛笑我江源東

入海與人何事大匆匆

一塵蝕盡元亭字入口饑號墨突煙笑指南湖作
衣鉢維摩香積好隨緣

立秋

何日是歸期情先去雁馳霜砧千里月簾笈九秋
詩別夢涼雲覺新愁夜雨知候蟲鳴自喜偏欲近
簾帷

夢雨迷巫峽愁雲塞具區一年京國住兩處信音
無苦蕙含湘的寒華抱韣不生衣更何用分付酒

家胡

得家書口號

淚零慈母手中綫腸斷深閨月下砧祇有當歸無別語可憐寸草獨何心

食蓮戲作寄任子田

天星明厯厯紫垣鑿白石江風吹團團水官祭蒼璧穹窿圓影同一漚磊磊落落不盈尺紫貝之闕白玉堂紅雲倒燭青琳光綠毛仙人下大荒騎翠虬入銀潢手把青珊瑚種向河鼓旁流落人間萬古花開十丈削成而四方天風何處來但聞雲子青精香吾聞之吾師服食得不死休糧往從之

宛在水中沚江妃宴日花正開水樂泠泠奏宮徵
碧綃剪字邀月姊妾魚倭髻垂雙珥珣玗琪樽酒
盞忻然乞我方寸七雲牕洞房畫不局魚目斑斑
掛龍耳太乙老仙聞思大士葉葉雲帆渡渺瀾抱
送天上水精子駢頭玉龍兒眸子青如水脫卻古
錦綉換著雲藍綺縠弄明月珠搘擣青茅匝濂溪
周先生胡爲見之喜不知本是太華玉井之所生
謂是太極元宮三素得六子如何鑿破混沌竅剝
落黃中理束縛苦受兒童愚形模空令婦女訾荷
衣襠襯面如鬼麗眉書客秋蓬矣

九月六日出都口號

也知聚散似搏沙
生事無涯意有涯
遊子何心甘白粲
歸途信手插黃花
絮雲作雪遮車蓋
弦月因風送馬撾
猶有虛囊誇逆旅
隨身蠹簡舊紅牙

南歸連日大雪守陂疊聚星堂韻見貺繼和

一首奉詒

又見吳江落楓葉
峭帆冷戰江天雪
歸來帽側履亦穿
拍手吳兒笑欲絕
遲君飛佩同韻頌
自詡長松未摧折
一年各作牛馬走
百事浪逐雲煙滅
巨觥慰勞忘迭更
別緒紛綸怕牽掣
祇有詩篇如合

支笑多結習還點纈昔人僵臥定何事叩門干人
真不屑艱難奇麗隔年尋偶然指爪纔一瞥前年曾和
禁體

雪詩也知到家仍浮家可能忘象先忘說新詩脫

口旋書空遮莫撲面飛精鐵

守破鉤山查飲子疊前韻爲報并索和

破寒日進三蕉葉滌除熱惱還嚼雪載歌木桃矢
永好代乞隣醯自笑絕日來腸肚困煎燭夢遊空
想密藕折愛此曲直之精華鑽之色香味不減煮
以石鼎調以飴井華夜浸朝纓掣柘漿凝椀澌紅
冰流霞照臉生丹纈寒酸嗜好自同同齒牙愛惜

眞屑屑癡兒強索不知味一滴入口幾眼瞥天上
酥陀不可知蜀客糖霜何足說他時煮酒嘗青梅
閒情更好鎔心鐵

積雪凝寒懷守陂客蘇州疊東坡北臺韻

擎音聽徹玉纖纖冷戌荒雲凍益嚴倦客愁眠懷
越被寓公旅食記吳鹽定無撲朔寒偎腳且有芻
尼喜報檐芷望歸飛清獻鶴好憑問訊蜀山尖近得

虛谷太守信約歲內可還攜李

卜宅頻看屋上鵠不嫌家具少於車冷官衣上蓑
帽月羈客懷中鄧尉花喜迫灰堆聯好夢還邀泥

飲過貧家禦寒笑指詩囊在卒歲無衣手自

哭傅玉笥先生

海山兜率總蒼茫絳帳虛明太乙光兩世貧交尊
老輩廿年後進拜孫行病翁長與青山冷窮子來
歸白社荒誰使夢中呼起起露零書帶有餘香

可憐少賤兼生晚猶及循牆見老成圯上再來空

躡履浮邱一去悵吹笙彥彥壽石垂金龜乙乙寒

芒耿木精用東方曼倩事忍向西湖問山水醉翁行處總

淒清

先大人集中有墓祠廢營殘陽初月四詩外

舅曾屬和并令汝璧亦追步四首

盡日靈風吹古邱
支離桂棟冷煙浮
臥牛礪角自驚起
拱鼠銜麌時出遊
土鼓喧逐聯小社
雲車恍惚降虛樓
野人匱飯猶邀福
杯琰陰陽識鬼謀
氣祲全銷豹帳移
太平鐃吹憶旋師
縱橫壁壘餘形勢
颯爽風雲閱歲時
馬勃秋深流碧火
苦花雨蝕臥虬枝
椎牛釀酒歌呼處
牧笛閒閒指路岐
影薄虞淵尙未沈
蒼蒼山木遠留陰
一痕早上歸鴉
背千里猶懸渴驥
心大漠平看雲磧
迥孤城斜見斗杓
臨更宜倒載高陽路
拍手攔街笑語侵

石巖
祠

天罅斜開玉宇清煙唉耿耿尙韜明望穿屈戌微
分影送去纖阿始下更涼露初零留客醉遠山薄
暉趁人行青天碧海愁多少桂葉新芽便有情易月

祀竈詩

臘廿四日三更初元雲一朶當吾廬云竈之神朝
帝都家家漑金飭中厨餽飣盤花紅綠俱豆砂麥
麩鹽蘿蔔甘有餳櫟苦有荼與奴白飯馬青芻平
頭媚竈摶衣趨厨嬾退避西南隅奚古祀典老婦
需黃羊白雞猪首臚禮有從俗還從吾挂旗結束
當啟塗東西拜陳醴醑兒童繞屋相揶揄曰司

命醉誰當扶昇來短檠肩兩抱昔棄牆角今雲衢

冬青柏葉中庭鋪旋下束緼難薪蘇

吳俗送寵以舊燈檠燭兩

竹筍爲肩輿雜錢楮燒之云祈福也轟騰爆竹驅夔魑照耀虛耗竄
躡駒神官染面森虯鬚蒼龍黑螭前躍躍羊角風

起紅饃餽天雞呢喔天星疏地行賤臣山澤臞惟

大司命父母且額塌沙土口兜嚙寄牋手版請識

諸東鄰詩人老且愚枯腸瀝酒追亡逋西鄰經生

守齧甌逐貧不去觀餅居聰明利市不可圖而我

願嚮常區區考槃擊壤容歌呼睭睭訕訕無處無

敢云豈弟神所俞先生詞訖神盧胡紫垣詆蕩高

而虛年頭春腳隙裏駒陽阿晞髮神歸乎

銅梁山人詩集卷第二

渝江王汝璧鎮之

試燈日守波見過留飲抵夕別去案頭有六
一嘗新茶呈聖俞詩用其韻奉簡

彊歡無謂坐達旦日高濃睡驚呼茶先生高興便
過我熟客到座兒童誇年頭一別忽旬日巨壑雷
動初蛻蛇一年心事又蠻蛇暫時笑口開吧呀酌
君舊臘所餉酒春盤雜簇冬筍芽豈惟澹泊適心
賞直拚酣醕醉歲華農祥晨正啟青鳥蘭卜夜祝
迎苑筮此邦信美寓公耳風物尙戀桑禾麻陽春

暖律入歌詠醉墨揮灑隨欹斜
風人瑣屑吟蟋蟀瞿瞿良士聖所嘉
職思不廢及時樂吾生那可窮
津涯無根白日趨虛景有情短檠生夜花幾堆未
掃牆角雪半輪纔動月窟蟾清光出戶送君去欲
摹好景空咨嗟作詩誰暇論藩闥幸不叅雜兒語
哇

留任子田

昔年未識任公子好詩一句兩句在人耳所嗟道
遠莫致之忽喜伊人在秋水涼風八牖君適來一
片瑩澈清無滓自慚纏短難汲深乍快文章識緣

起自從識得君一別往往周星紀一年分手垂虹
亭去馬來牛榜船尾一年攜手踏槐市均堂濺濺
暴頤鯉羊胛熟幾時歲序周復始春雲翳碧落寒
花發黃裏誰使君來助我喜君故不支離我亦不
恢憊夜坐輒至卯嗒然但相視樂歌鏃吹數十章
搢金戛玉應宮徵讀罷長跼言願投吾師事于予
掉頭不謂然吾暇乎哉聊爾耳四十四萬金石編
三千三百經曲禮吾儕兩耳目所及何異太倉一
糠粃自笑說子而未能三年不學則何以便當捆
書去卜鄰巢畏壘冥搜入穹窿細索積黍糓造化

徒拘拘吉祥自止止二十男兒何所憂滄滄涼涼
未移晷柰何舍我去又送蒲帆逐清駛離緒無停
機腸轂安能柅不如鶼與鰈骨眼自終始不如蠹
與蟬牙須交斐亹春風卷地各自飛社燕秋鴻紛
莫理去去各閉門得心應手車同軌他年汗漫高
額頹更上虛空跨綠駢

登煙雨樓口號送子田別

雨外一帆暝雲邊獨鳥飛嫩寒侵網戶別夢落漁磯

鴛鴦今昔夢楊柳去來思盡日無言處盈盈水一

規

禽言五章

喚工做活今日不作來日無獲

提壺盧甘酒溺膚馮河溺軀公乎慎諸

婆餅不焦婆心焦阿婆焦勞小姑益騎

空孔空孔燕雀處華堂牛羊下荒隴

鳳皇不如我我有靈脂治人疾可

蟲言五章

類予類予則類之夫蛾子術之亦各從其類兮
遮了羽脩脩日杲杲執翳來離朱眇

唧唧復唧唧燈青芒角赤天河迢迢當戶直離離
奇奇大星白

冥冥翥翥糟邱肉陵五鼎食五鼎烹吁嗟乎營營
瞿瞿瞿瞿促織踧踧不輒而趨而思而居

送守坡北上用少陵贈衛八處士韻

治裝越三載行止日費商及去猶恨速戀茲晨夕
光尋常依枋榆咫尺遇莽蒼春風起羊角鳥道盤
肝腸舉首笑雲翼浮杯泥均堂安得北飛魚遠逐
去雁行春歸亦遲遲溯洄水一方流連滯嘉詠漢
齒霏瓊漿信能慰朝飢又何求稻粱平生萬里心

紓迴一舉觴羈懷遠山積別緒春波長踟蹰已忘
言流景何浩茫

浙江風泊

鳳凰高騫披我出天風浩森雲滔滔犧車捆載達
江滸漁童攜襍登輕舠維時定山鐘罷午餘瀾鬱
屈還怒咷海風忽當潮尾立黑雲一握驅銀濤往
來衝突不相下兩厔牛馬聲歛嘈天吳少鯲風伯
勝雪然萬騎奔長旛鯨牙高摩擘岸起坐覺萬瓦
皆浮泡詎有三千六百釣遠山疊疊如連鱉烏篷
合沓眾助譟纜者蠻觸帆激謫我舟交組賀撐探

旋洞拍浪猶敗瓢那能挂席濟滄海且可安枕依
江皋小時舉足輕萬里有如強弩纔離弨弋來遊
倦意亦倦何異竟日咀空螯旣非銜命山海國往
禦魑魅驅鱸蛟亦非泛槎牛斗渚手抉雲漢斟天
杓書生意氣可詫笑乘桴好勇空詠調祇今履險
纔一快甯似聚族安鳩巢饑兒乞米向天末遲遲
意緒紛勞忉忉船唇久手意先往雲峯天外相招邀
向人姽婳自娟妙絕似倒暈眉新描更有鳴禽破
岑寂溪風夜寂寥林朝嘲羊裘老子舊相識同君亦
復成久要山翁八九皆老醜蒼顏綠髮晴如貓相

期採藥入深谷掉頭長謝非吾曹千秋事業在門
內那羨槁木藏山椒饑寒齶齶何足道丈夫落拓
終折腰

富春雨泛用謝康樂韻

峭帆轉江山曉煙別城郭密雨散清漚溼雲蔽藂
薄連岡蛙鼴跳長風馬牛錯孤蓬如網罟壯觀亦
溝壑冥默生繁憂瀨瀚聊棲託山風增薄寒遊子
感孱弱未贏三月糧詎有百金諾努力事遐觀羈
心忽中落打頭笑榜人布指慚屈蠖

家章伊明府邀遊文昌山索詩紀之卽以留

別

千山蜿蜿如鬥龍鬱勃跌蕩不可踰山城如斗落
井底石湍日夜驚磧礧童童頑礦少意思其不猶
劣皆龍鍾神靈歛歟苦全蔽夸蛾賈勇難爲功山
雲遮我十日住心腸蒼翳多粵峯蠻煙瘴雨日搜
攬紙牕墨色號枯樅峭風侵肺作寒熱蒸嵐染面
成盲聾有時躡屐踏蓬廬自笑卻走如駢蛩詎無
佳人在幽谷野翁終老嗤章縫吾家大令具勝槩
好事頗類玉局翁謂言文章此蔭鬱繁星粲粲煙
濛濛幽尋一逕入鳥道手扳幾朵青芙蓉孤雲四

角自融結環中得此一畝宮權輿意匠費經畫量
分俸入爲鳩工已聞栽竹齊萬个更喜拓地規數
弓剗破雲霞煥金碧遮羅星斗歸房櫳元精炳焜
照下界邦人自此開屯蒙松花被徑山霧曉褰衣
士女爭昌丰我來適值新雨後山田日暖啼鶲鶴
奮人朴陋自力作官蛙呌譟相鳴訌陂陀登頓踏
錦石小鱗五粒青蒙龍振衣直上一千仞羊角料
峭摩蒼穹遠招近揖不暇給泠然雨披搏天風一
溪無聲掣飛電千家聚落屯深籠頽雲欲雨且不
雨殷雷山腹驅豐隆流泉瀇瀇遙階甃尺地恐與

天池通由來人事有窮達神物顯晦將母同茲遊
澹泊致足樂後之視昔情何窮作詩紀勝後錄別
歸雲天外猶萍蓬薄寒日夕感遊子新月皎皎流
天東

病痞日外舅過問攜示近詩并貽貢茶 賜
藥欣然成詠

百毒朝朝助苦吟好求翁罵作砭篴頭綱乍閱紅
紗茗上藥兼分紫萼浸漫與詩篇眞卻病老來兒
女最關心葱湯麥飯慚供給還喜扶鳩過蔡沈

宮怡雲先生餉酒及綠茶小詩寄謝

綠茶出蜀
玻璃江

鄉蔬盈芻酒沾巾嘉惠從知老輩眞吳釀到齊還
到蜀溪毛非組亦非綸蠶衣細蹙玻璃色眼纈遙
憐麴米春他日秋庭侍盤饌更斟菊酒膾絲尊

外舅見和前詩疊韻賦呈

翩翩雙燕感羈吟覽取鵠衣賴引箴五秉那煩分
冉有三年祇笑悅曾參周公明宣事纏綿不盡絲蘿累
教誨甯知果贏心惶愧鯁生活升斗渴來漸解辨

浮沉

怡雲先生和前韻寄示再呈一首

不衫不鞶不冠巾踵息眞人祇率眞獨喜長頭來

問字更因叔迄去垂綸玉池水滿自消暑茅屋風
清時買春五載萍居懽接菴不嫌留滯爲湖蓴

再疊前韻柬虛谷太守并懷守陂需次都門
親滌中希正葛巾迴車折坂見天眞久聞烏鵲環
遮轂多謝陽鷺暗披綸襦袴遺安三萬頃希羈上
壽八千春施看借寇還迎郭那便烹鱸自芼蓴
倦遊自笑墊烏巾交照多君意氣真鵝鳴歡呼隣
杜甫弟兄輩行廁盧綸見盧允詩問羊客去心如石
夢草吟餘氣似春遙待佳音報黃耳到時正好擷

秋萼

題崔鑄子母猿圖

崔耶畫史稱美久朝雲暮雨顏色新紛紛人孰知
正色只恐獵狹長笑猿公嗔俄而右臂化猱子五
日一石十日水畫水不深石不怪斬斬嘵咤猱不
喜水中有月人不知蒼嵒眞僨伏蹲而娛陀羅臂似
飛瀑垂月亦不肯上山亦不肯低金波上下合與
離眼睛光活如波斯盈盈含睇不盈手背上團團
月如斗連尻結股脫襁兒舉手招月月生肘不知
暮四忘朝三噫嘻水晶宮闕雙玉盤黑雲峯森睡
驪靜石骨削芳神珠寒我訪大山宮謂守坐對方

丈雨陰蘿冥冥如有聲恍在瀟湘之南洞庭渚我
本巫山人識此醉道士三聲啼罷月夜分十二峯
頭長孫子何須淚霑裳已覺月落几可笑李太白
采石磯邊月空碧復有柳柳州桂嶺瘴來王孫愁
甯知此公弄月一千歲劃然一嘯歸林邱宮孫爲
我言肯爲作歌許借觀綽虐顧我仙人頑在我猶
在子此理甯非天詩成大笑攬而走宮孫挽袖進
大斗是時缺月下鬼柳相視而笑遂相與爲友

夏夜歌

雲峯入壑青天高饑鼯撲撲巡黃茅黃昏無風黑

無月天河半落星勞勞偏袒生羅藉苔發別院松
風吹石溜漆燈一點流牆陰玉露闌珊下清漏涼
煙不動鋪桃笙蠟珠翕赫飛祥鵬繁憂鬱悒不成
寐蚊雷逼耳啼嬌嬰花蟲不食古糟粕鐵鎗年深
吐芒鍔夜闌時作金石聲驚起天雞鳴脣脣

讀山海經

坐遣三庚伏還尋二酉藏神州懷帝禹蕃譯凜天
王怪入兒童篆祥生日月光由來天外事殊未盡

荒唐

納涼

蕙風吹暗綠荷露落輕陰卽此成幽賞因之寄遠
心褰衣看紗綺仰面數辰參不覺涼生披裘裏月
上簪

月夜詠懷

明月不辭影竟夜不可卽朱絲不藏聲再鼓聽愈
默契虛如有餘移情究何得光風煦流萍漾水生
顏色生小屬斷蓬百年猶弱植撫膺念前修游神
矚四極結想將焉窮瞿然思所職

觀櫺李賛會用老泉水官詩韻

當夏積潦陰陽之氣有沴鄉曲愚憲史巫

紛若迺相率釀金賽饌像鬼而娛紳嬰兒
於橦以爲戲珠玉繡組雕繪瑰奇之飾竭
蹙羅致爭相夸炫邦人士女心心盱盱相
望于塗子怪焉詢之鄉人耋老者云吳越
人歲時率以爲常不足異也夫非禮則誣
誣神者非福誰其尸之其或吐之矣爰作
是詩以示扶俗微意云

南人習尙鬼事鬼欲勝天朝載鬼一車暮送鬼一
船邇又賽鬼伯晚鼓來淵淵偃僂各南膜戢戢頭
如黿不知道何語侏儒舌濶翻廣衢百戲陳炫晃

堆煙鬟誰家玉顏兒暝坐十丈蓮尋橦舞都盧緩
吹歌綿蠻靈衣何披披左右馳星旗鬼吏新染面
拱手各抱脊鬼卒來打街劣如出水鱸市人走若
狂有力不可扳萬金聚一餉百寶不媚川家人亦
皇皇滿注茱萸煙我來亟止之猥言命所關吁嗟
古祀典一一存簡編鄉饊有磔攘土鼓無凶年神
道詎可誣貨利歆誠難豈弟神所勞不繫元與禪
作詩質正直辯者其來前

暑夕

飄風不成雨落日猶在樹青蟬零落鳴殷雷湖外

去幽蘭有悴容倦鳥無高翥亹亹生秋霞翾翾蛻
花蠹煩疴遺疏曠靜念謝馳驚坐忘時自驚感深
意轉裕美人望不來冉冉空煙暮

雨餘用謝康樂韻

金風猶在伏秋氣尙未顯過雨含華滋輕陽泛紅
泣新蟬集池林好鳥下庭峴端居撫物候昔夢復
遐緬炎風日驅趨蹇足自輾轉泥途浩縱橫厲揭
昧深淺退飛還迷方流雲自難卷百端忽填膺五
色紛亂眼轉蓬未暇安羈羽詎能展適意乍可欣
忘言欲誰辨及茲風景清庶令煩憂遣

金華一
二
六月晦日喜雨

雷聲殷煩壤海氣振幽寥旁礪金猶伏蒼茫火欲流笙鐘酣雨腳鱗鼈昧雲頭大澤潛驅旱今年喜有秋

七夕和昌谷韻

果然天外事茫惚使人愁纖月不照地流螢時上樓暗光零砌草微響動簾鈎浪喜從兒女桐風自報秋

普耳團茶

箬裏輪囷手自捫螺峯深翠結雲根信如蹙縮翠

牛臆疑有迷離玉兔魂
嫋女按挲尤密綈酪奴風味
尙溫磨從教不入君謨譜圓鳳盤龍底足論

素心蘭歌

秋風一夕吹眉綠玉露星星浣纖縠更無人問空谷蘿絕代明珠耿幽獨翠鬟星的立踟蹰暮煙如水涼生膚寸心宛轉機上素區區何用紹襟渝好風消息過張碩環珮無聲遠天碧五銖戌劍垂雲衣冷月分明下姑射谷風習習香揚揚不因邂逅生容光同心綰結委蕉萃離離蔓草含孤芳不矜奇服庸何傷南陔雅韻傳笙簧

瓜燈歌

細剝犀瓢鏤蟬翼銀甲金鎧好雕飾偷取仙人一寸光
照作千年古燈色海雲扶月頭上生滿堂美
人皆目成煙蛾倒暈玉腕碧藍葉盈襟空復情贈
我琅玕大如斗員嶠壺天落吾手嬌兒稽首琉璃
王鉢底蒼龍抱珠走忽爾花釭不照席暗光著人
吹筠璫西明紺袖背秋煙冷僛朧聚陰闇從教
解放囊中螢鎮心照字尤惺惺吳娥巧奪彩蟾魄
汗青愧我空乞靈匏瓜濩落不可食笑對秋河織

女星

和士會兄絡緯吟

荒庭刺促秋聲苦七襄風露零如雨呢呢怨語未
分明軋軋機絲費覩縷丁丁唧唧長知更槭槭颯
颯斷續鳴左旋右轉旋轉聲柔腸寸寸千迴繫一
部清商夜蕭蕭前趨音爲羽股音角小聲喟嘶緒風
吹指撥依希寡女絲洞房纖月浩無主牆角燈檠
花放時煙寒露重忽變徵皎女投梭夜中起無情
縵素空有情死央濃睡懶不驚錦字何人聯雜組
瑤井玉繩已如許芳草王孫愁柰何遮莫昔昔相
和歌

九月士會兄行役江右汝壁亦饑驅入吳
被亭皋淒然暮雨匆匆分手不能爲懷比至
吳門鹿鹿酒場心事俱廢中懷拂鬱不足喻
人枕上得句以寫我憂不知山雨江船愴曠
增歎更當何似也

錄別不能成一語澆愁漫說倒千觥他人那得知
兄弟世事何嘗有性情強笑風天慚贅婿銷魂雨
夜感饑傖已判兩月無佳句夢草多應也瘦生

日日四首懷士會兄

日日上橋頭凝竚不能走片雲天南來下有歸帆

不

日日臥齋閣不寐聽流喝寒雲曠紙牕喜鵲噪朝
闖

日日看天色莫放寒颺吹阿兄行無衣解衣甯有
誰

日日坐繙書古人與我獨燈花待君歸煌煌共宵
讀

贈徐晝三

徐生純明白玉璞

六句

樂哉綦縞城東門近牀紡

車耿夜火堆盤瓠葉明朝瞰蜿蜒滿壁饑蚓走閣

閣兩部鳴蛙蹲蓬頭凍骭八九輩聲牙生澁頰目
暖口頭盤詰手指畫鞭其後者前車掀先生糠覈
笑經筍細君腰襪寬袒袂咿唔伊鴉兩相和數間
破屋清而溫樂哉徐生永弗謾婦能養姑潔蘋蘊
父爲折薪子負擧讀書積善無憂煩門前長水波
沄沄便似千里淮肥奔天翁有意洪其源暫令閼
畱天池鯢幾時不見予心簪轔轔斷綆無潺湲忽
來叩門喜刮目朝食未飽不及殮癯者忽肥若有
得乍疑衣帶皆蘭蓀果然袖中出新著紛披鬱葉
飛繙帶謂言一歲之所獲有如納稼登嘉糜才豪

往往見圭角緣情亦復多嬋媛愛君磊落自振拔
不屑啁哳同鳴鶡從來寶礦雜砂礫參天古樾毫
未葩抑聞變化在啄范況乃毛骨驚雛鷁而我頑
鈍多塵根索居陋室如戴盆愁緣枯桑抱黃蘭蠹
蠹萬慮勞營魂東塗西抹何所樂朝啼暮喈誰與
論上堂但奉方進屨對客還著相如禪書叢偃蹇
日月除憂來無端不可捫多君鞭策起駑步獨嚴
驥勒麾幢旛蹀毛盛氣夸觜距袒裼大叫呼櫓櫟
笑予嗒然肘拄座玉丹未得空吐吞怪底初平兀
如石寒夢遠落潯與溢霜颺獵獵攬牕戶擁衾苦

憶寒江船

時家兄客江右

硯田蕪穢久不蒞冷落三徑孤

清樽他時乘興趁歸棹踏雪共訪梅花村